

讀史舉正

讀史舉正卷五

仁和張燭曦亮著

晉書

劉頌傳

頌卒以隔爲適孫襲封永康元年詔以頌誅賈謐
有功追封梁鄒縣侯案此則隔襲封當在永康之
後文誤置前又案梁鄒縣本書地理志無

李重傳

重江夏鍾武人

張光傳亦云光
江夏鍾武人

案本書地理志江

夏郡無鍾武

傳咸傳

奏免兼河南尹何攀等案攀傳無兼河南尹及免
官事且其人非可劾者疑別一人非蜀郡何攀也
傳祇傳

以司徒持節大都督諸軍事案文大字衍

閻續傳

楊駿誅續葬之駿從弟模告武陵王潛案駿傳誅
親黨夷三族安得有從弟在且人葬其兄而告之

亦非人情駿爲賈后所害則模者乃后從兄賈模耳又澹時爲東武公亦未封王

阮放傳

放敗走保簡陽城案簡陽縣屬甯浦郡地理志不載

華譚傳

遷廬江內史案廬江非國不當云內史

愍懷太子傳

使太保何劭詣東宮廢太子案劭爲太子太師未

嘗爲太保

右衛督司馬雅案趙王倫傳作左衛司馬督司馬雅

六月己卯葬於顯平陵案永康元年正月癸亥朔推之本紀作壬寅爲是

襄陽王尙永甯元年八月立爲皇太孫案本紀在五月

陸機傳

成都王穎討長沙王乂假機後將軍案穎傳作前

將軍

通鑑同

長沙王與機戰於鹿苑機大敗將軍賈稜死之案

本紀太安二年十月破陸機于建春門斬其大將

賈崇

通鑑同

周處傳

處義興陽羨人案陽羨本屬吳興郡至永嘉四年

處子玘破錢璲乃置義興郡處時安得預稱

周玘傳

右將軍陳敏助玘攻石冰案敏傳未嘗爲右將軍

時爲廣陵度支耳

周訪傳

前云杜弢遣將張彥陷豫章訪斬彥後云弢遣杜
宏出海昏訪擊敗之案海昏屬豫章本紀擊宏斬
彥竝在建興三年三月

通鑑同

疑一事傳誤分爲二

楚王瑋傳

武帝崩人爲衛將軍案瑋以惠帝元康元年二月
入朝楊駿誅乃爲衛將軍非武帝崩時也

趙王倫傳

使尙書令滿奮奉皇帝璽綬禪位于倫倫僞讓下
又云義陽王威逼奪天子璽綬先後乖錯

孫會等與義軍戰于激水案激水卽大瀍水出南
陽葉縣流經郛城商水而入潁水時成都王義軍
在河北去激水遠矣紀作洩水爲是

齊王冏傳

冏起兵遣使告成都河閒常山新野四王案新野
時爲公非王也

封葛旗牟平公劉眞安鄉公案地理志無牟平安

鄉二縣

又路秀封小黃公本紀作路季

又衛

毅封陰平公案五公所封如小黃封邱皆近洛陽

不應毅封獨遠本紀作平陰爲是

平陰屬河南郡

幽其子淮陵王超案淮南王允傳允三子皆被害

齊王同請以其子超繼允後本紀作淮南王爲是

光熙初復王封子超嗣爵案本紀在永興二年四

月

河閒王頤傳

元康九年代梁王彤爲平西將軍案本紀作鎮西

將軍

李含與齊王同司馬趙驤有憾

含傳同

案驤爲成都

王督護不應爲同屬

范陽王虓遣鮮卑與平昌博陵衆襲河橋案平昌公模事有之博陵則是何人疑有脫誤

東海王越傳

成都王攻長沙王諸將疲于戰守密與左衛朱默收又別省逼越爲主案又傳乃越與諸將潛謀收又通鑑從之

太安初帝北征鄴案本紀在永興元年七月

越起兵以尙書曹馥爲軍司案此當爲周馥馥傳
東海王迎駕以馥爲中領軍可證

解系傳

系濟南著人案本書地理志無著縣

牽秀傳

長沙王遣秀討張昌秀出關奔成都王穎案出關
上事跡不明必有脫漏

閻鼎傳

中書令李暉案暉旣爲中書令則位已尊矣豈可復爲鼎參佐愍帝紀作中書郎爲是

劉聰向長安爲賈正所逐走還平陽案聰時已卽位未嘗至長安正所逐者劉曜耳其還平陽者亦是劉粲非聰也

賈正傳

西平太守竺恢案文西當爲新

荀晞傳

帝還洛陽晞奔范陽王虓案通鑑晞奔時帝尙在

鄴

華軼傳

軼爲江州刺史自以受洛京所遣而爲壽春所督案是時督江州者元帝帝時鎮建鄴何得云壽春

劉喬傳

劉琨濟河攻喬喬不敵而潰復收散卒屯平氏後又云劉琨分兵向許昌許昌人納之喬眾散奔平氏當爲一事誤分爲二

劉琨傳

永嘉元年爲并州刺史案下表當在光熙元年十月

猗盧留其將箕澹戍晉陽案魏書箕作姬

匹磾從弟末波案石勒載記匹磾傳皆作末杯

李矩傳

郭默爲劉元海所偏案此時元海已死當云劉曜
段匹磾傳

建武初與劉琨討石勒後云及王浚敗領幽州刺史劉琨自并州依之案此皆建武以前事傳倒置

又王浚死匹礮入薊傳漏脫

郭默傳

劉元海遣從子曜討默列三屯圍之案此劉聰時事通鑑入建興二年六月

以默爲豫州刺史案豫當爲江時庾亮爲豫州刺史

默反武昌太守鄧岳馳白陶侃案桓宣傳岳乃西陽太守武昌則劉詡也

淮南王允傳

太康十年徙封淮南仍之國都督楊江二州諸軍事案惠帝元康元年七月始分揚州荊州十郡爲江州太康末尙未立也

陳徽兄淮時爲中書令案通鑑注有中書令陳準淮蓋準字之誤

王導傳

晉國旣建以導爲丞相軍容祭酒案此在建興元年五月元帝爲丞相後時晉國尙未建也建武元年三月帝爲晉王以導爲驃騎將軍都督中外晉

國建當移在此

進位侍中司空案此在大興三年七月傳入舉羊

鑒前誤

劉宏傳

以仇勃爲歸鄉令案地理志無歸鄉

羅尚爲李特所敗遣使告急案此時特已死尚爲

李雄所敗耳

起璠爲順陽內史案順陽非國

陶侃傳

都督荆雍益梁案本紀作荆湘雍梁通鑑從之

溫嶠傳

鄱陽內史紀瞻案瞻時位尊而且死矣本紀作睦
爲是

郗超傳

轉愔爲會稽太守案愔傳當云內史

郗曇傳

都督徐兗青幽揚州之晉陵諸軍事案本紀與通
鑑有冀州無揚州

顧榮傳

惠帝幸臨漳案臨漳建興初避愍帝諱改此時宜
稱鄴刁協傳東嬴公騰鎮臨漳丁紹傳臨漳被圍
王彌傳與勒攻臨漳皆誤稱
丹楊內史王曠案丹楊非國

劉隗傳

率萬人鎮泗口案本紀作鎮淮陰

戴若思傳

都督兗豫幽冀雍并六州諸軍事案本紀作司兗

豫并冀雍爲是蓋幽州劉隗所督也

劉超傳

超謀奉帝出峻使任讓收超案此事在咸和四年正月時蘇峻已死矣當云蘇逸

陳頽傳

頽陳國苦人案地理志苦屬梁國

歷陽內史失彥案歷陽非國

庾亮傳

轉參丞相軍事案上云轉丞相參軍未曾改官於

文爲複

撫軍將軍南頓王宗有異謀案宗傳元帝時爲撫軍至此已進左衛將軍矣

庾惲傳

贈侍衛將軍案職官志無此名

庾翼傳

石季龍汝南太守戴開詣翼降案戴開來降係建元元年七月事不應入此

桓石虔傳

符堅荊州刺史梁成案堅載記作都貴

桓沖傳

遣宣城內史朱序向壽陽案序傳序未嘗爲宣城
內史此事在太元元年通鑑作兖州刺史爲是

荀崧傳

藩承制以崧爲襄陽太守案通鑑作襄城

荀羨傳

救段蘭蘭當作龔龔蘭子也時蘭死已久矣

慕容蘭以數萬眾屯汴城案通鑑注汴當作卞魯

國卞縣城也

劉惔傳

永和元年惔爲義成太守監沔中軍事傳遺之

王允之傳

除宣城内史案宣城時不爲國 又監揚州江西

四郡事案文四郡下少諸軍二字

虞潭傳

除沔鄉令徙醴陵令值張昌作亂案劉宏傳宏旣
平張昌以潭與有功表徙授醴陵令潭傳前後不

符

何充傳

建元初出爲徐州刺史案本紀事在咸康八年七

月己未

通鑑同

蔡謨傳

謨陳畱考城人案考城後漢屬陳畱晉地理志無

殷浩傳

張遇反謝尚敗績在請鎮洛陽之後案本紀遇反
在永和八年二月尚敗在四月而通鑑浩聞張遇

言身是二卷三
三
作亂謂苻健已死請進屯洛陽皆在九年十月

謝尙傳

苻健將張遇降尙案本紀及通鑑遇乃趙將非苻氏將也

王遜傳

甯州刺史李毅卒永嘉四年治中毛孟詣京師求刺史案通鑑毅卒在光熙元年明年永嘉元年毛孟詣京師求刺史

以釗爲越嶲太守案通鑑作知提守又將軍姚

宗案本紀及通鑑作姚岳

顧和傳

和爲王導從事曰昔閩族叔元公道公叶贊中宗云云案下文有永昌初等語則是時元帝尙未崩安得稱中宗此節當在後誤置于前

張軌傳

永嘉初東羌校尉韓稚殺秦州刺史張輔案本紀在永興二年六月

通鑑同

此云永嘉誤也又輔傳皇

甫重傳及本紀皆作隴西太守

在州十三年卒案本紀軌卒在建興二年五月通鑑軌以永甯元年正月爲涼州刺史統計之當云十四年又謚曰武公案通鑑作武穆

張茂傳

太甯三年卒案魏書惠帝四年張茂死是年乃晉太甯二年也

張駿傳

太甯元年駿猶稱建興十二年案茂卒駿嗣位在太甯二年

咸和初劉曜攻枹罕駿使韓璞辛巖擊之戰于臨洮爲曜所敗追至令居案上云咸和初遣辛巖等會韓璞攻秦州劉曜屯狄道襲巖敗之攻陷令居云云與此當爲一事

張重華傳

謝艾進封福祿縣伯案上已云封福祿伯此重見重華卒時年二十七在位十一年案本紀重華以永和二年嗣九年十月卒僅八年耳又本傳年十六嗣位卒時當爲二十三而下又云子曜靈年十

歲前後不合必有一誤

麴允傳

劉曜寇北地允次黃白城以救之案黃白城在今三原縣晉北地郡則今之慶陽府甯州環縣境也路迴勢不相救劉聰載記乃曜攻長安時事于理爲得

沈勁傳

升平中慕容恪侵洛陽案本紀事在興甯二年

曹攄傳

少好學太尉王衍見而器之案摠爲洛陽令愍懷太子廢宮臣冒禁辭送被繫賈謐語曹摠釋之江

統傳而衍爲太尉在永嘉三年相距甚遠傳誤

王濛傳

祖佑北軍中候案世說新語註王氏譜佑散騎常侍

王修傳

修作賢全論案世說新語王敬仁作賢人論全蓋人字之誤也

王嘉傳

嘉隴西安陽人案兩漢志及本書志隴西無安陽
苟灌傳

崧爲襄城太守案崧傳崧都督荊州石覽時爲襄
城太守

王敦傳

遣豫章太守周訪等討杜弢案訪傳時爲尋陽太
守

帝微服至蕪湖察敦營壘案本紀作于湖爲是時

敦屯于湖未嘗在蕪湖也

桓溫傳

除瑯邪大守案瑯邪故爲國當準本紀作內史

庾翼薦溫于明帝案翼傳作成帝爲是

通鑑同

蓋翼

傳云蘇峻作逆翼年二十二則明帝時尙少未得

薦溫也

王彌傳

聚徒海渚爲苟純所敗案此在永嘉元年十二月
誤入引兵寇青徐前

與石勒攻臨漳下又云與勒攻鄴文複

以二萬人會石勒寇陳郡潁川案地理志陳縣屬

梁國無陳郡

王如傳

南安龐建本紀作新平人

劉元海載記

劉景擊并州刺史劉琨于板橋案此事當在永嘉
元年

太史令宣于修之案姓譜有鮮于而無宣于通鑑

考異據晉春秋作鮮于修之

永嘉四年死在位六年案淵以永嘉二年僭卽皇帝位四年死則六當爲三

劉聰載記

王師敗于社門注一案洛陽有稅門卽清明門無作杜

社杜二門社杜蓋稅之僞

護軍麴允頻陽令梁肅自京兆南山奔安定案時同奔者尙有馮翊太守索綝見通鑑

杜人王禕紀特等攻劉粲于新豐案紀疑是麴之

譌通鑑作麴特爲是

劉曜載記

輔威呼延清案通鑑作呼延青人

元海以永嘉四年僭位至曜三世凡二十七載而滅案淵以永嘉二年十月稱帝至咸和四年滅止二十二年

石勒載記

劉元海稱漢王于黎亭案劉淵初稱王于離石左國城次年乃徙屯黎亭

濮陽太守苟晞討公師藩案晞傳無守濮陽事通鑑作兗州刺史

江夏太守楊瓌案本紀及朱伺傳俱作楊珉

都督冀幽并營四州軍事案營州不見地理志至慕容熙始置

攻乞活李偉于上白案本紀偉作惲

屯于景亭案景亭疑是倉亭今范縣東北

遣王步都爲徐龕前鋒案蔡豹傳作王伏都

龍驤將軍王國叛案本紀作南陽太守

通鑑同

咸和七年死案本紀勒死在咸和八年七月又案
魏書序紀烈帝五年勒死是年卽晉咸和八年也
石季龍載記

咸康元年稱居攝趙天王案本紀及通鑑皆在咸
和九年十一月

遣其子斌討羌案佛圖澄傳勒愛子斌暴病死又
勒載記勒僭號趙天王子斌封太原王然則斌非
虎子也

季龍將張賀度案本紀及毛寶傳作張貉

青冀幽州三五發卒案二語與上文義不合校通鑑當有爲東征之計一句

宇文歸執送段遼之子蘭案通鑑作遼弟爲是蘇亥周成執遵于如意觀案通鑑亥作彥如意觀作南臺

姚弋仲據混橋案通鑑作瀝頭

慕容皝載記

咸康七年皝遷都龍城案通鑑在咸康八年十月慕容儁載記

永和五年僭卽燕王位案本紀在永和四年

魏載記同

苻堅載記

堅伐代代王涉翼犍遁陰山其子翼圭縛父請降
堅令翼犍入太學習禮以翼圭不孝遷于蜀案諸
事與魏書北史皆不合什翼犍爲庶長子寔君所
弑其事自確記不知何所據

李特載記

涼州刺史羅尚案文涼當爲梁

辛冉出奔江陽案通鑑作德陽爲是德陽屬廣漢

特攻冉于廣漢就近出奔耳

益州從事任明案羅尙傳作任銳通鑑從華陽國志作任叡

李流載記

李離李雄謀襲孫阜軍下卽云攻羅尙軍前後不相蒙

汶山太守陳圖涪陵人范長生案華陽國志作陳時范賢

流死諸將其立雄爲王案雄僭號成都王在永興

元年此時尙稱益州牧也

李雄載記

雄誘建甯夷攻李毅毅卒城陷案通鑑從華陽國志有毅卒年月并其女秀守城事在光熙元年三月則是城未嘗陷也

咸和八年死案本紀在咸和九年六月又魏書烈帝六年李雄死卽咸和九年也

李期載記

咸康三年死案本紀及通鑑皆作四年

李壽載記

咸康八年死案本紀及通鑑竝在建元元年八月
呂光載記

鳩摩羅什勸光東還語在西夷傳案西夷傳無此
事

光遣子他討北虜案下呂超及隆殺呂纂呂緯說
他擊之他妻梁氏曰緯超俱兄弟之子又他謂緯
曰吾老矣而超告他呼爲叔父夫隆爲光弟寶之
子超乃隆弟使他爲光子則超爲從兄弟不應稱

叔父而是時光沒甫三年他亦不應言老并以超
爲兄弟之子尋前後文義當爲光弟非子也

呂隆載紀

光以太元十二年定涼州十五年僭立案本紀太
元十年苻堅死光卽稱涼州牧非至十二年始定
也又僭立在十四年光記與本紀同

讀史舉正卷六

仁和張煢曦亮箸

宋書

武帝紀

帝收集義徒檀憑之憑之從子韶弟祇隆與叔道
濟案韶祇道濟本傳三人竝兄弟此云與叔誤又
傳列檀祇紀言祇隆未知隆爲何人或誤祇爲祇
隆也南史本紀憑之從子韶祇隆道濟文甚明第
云祇隆或仍宋書文耳

慕容超遣廣甯王賀賴盧據臨朐南史作廣甯王
賀刺盧

帝遣建威將軍孫季高自海道襲番禺南史作孫
處

永初二年九月己丑零陵王薨

南紀同

案是年四月

己卯朔下三年正月甲辰朔推此九月無己丑日

少帝紀

永初三年十一月書戊子十二月書庚戌案下年
正月己亥朔則十一月不得有戊子十二月并無

庚戌也

景平元年正月辛卯祀南郊案是月己亥朔不得有辛卯日南紀作辛丑是又二月丁丑庚辰書辛未前誤

七月赦五歲以下罪人南紀作赦五歲刑以下文優

孝武帝紀

大明四年十二月辛巳幸廷尉寺案上書乙未下書丁未不當有辛巳南紀作辛丑是

七年十一月乙未原放行獄徒繫東諸郡大獄壬寅遣使貸卹案南紀作原放行獄徒繫浙東諸郡大旱十二月壬寅遣使賑恤爲是

前廢帝紀

以魏武有發邱中郎將模金校尉乃置此二官以建安王休祐領之案建安王乃休仁休祐則山陽王也南紀作以建安王休仁山陽王休祐領之爲是

明帝紀

晉安王子勛反鎮軍長史劉琬爲其謀主案南史及子勛傳皆作鄧琬此誤

撫軍將軍沈攸之代爲南討案南紀云撫軍將軍殷孝祖攻赭圻死之以輔國將軍沈攸之代爲南討此少十三字蓋缺文也

泰始七年二月癸巳征南大將軍荊州刺史巴陵王休若進號征西大將軍開府儀同三司案上五年閏十一月以休若爲征西將軍六年六月以休範爲征南大將軍此合爲一誤

順帝紀

昇明元年八月司空袁粲鎮石頭袁粲乃司徒時
司空齊王也

少帝司馬皇后傳

少帝司馬皇太妃案皇當作王以后後爲南豐王
太妃也然配少帝爲文宜稱后

王宏傳

宏薨增班劍爲十六人案班劍例二十人南傳云
六十人方爲增此作十六非

傅亮傳

祖咸司隸校尉案南傳作咸之元孫也文較明

檀韶傳

韶卒子緒嗣緒卒無子國除祇子臻臻卒子遐嗣
齊受禪國除案南傳韶卒子臻字係宗位員外郎
臻子珪本書祇傳祇自有子獻襲西昌侯爵此傳
文義錯亂疑誤

向靖傳

名與高祖同案文失一祖字南傳作與武帝祖諱

同

朱齡石傳

臧熹敬皇后弟咸服高祖知人案文義不屬南傳
作臧熹敬皇后弟也亦命受其節度戰捷眾咸服
帝知人爲是

毛修之傳

朱修之後得還具相申理傳失朱字

胡藩傳

藩外兄羅仝生案仝卽仙字之誤

武帝召藩參鎮軍軍事傳失鎮字

張興世傳

子欣業當從南傳作欣泰

臨川王道規傳

世祖以照爲中書舍人案文當云太祖

江夷傳

入爲侍中大司馬從府公北辟南傳作累遷大司

馬案文二書竝有缺誤

臧燾傳

宣太后配食燾議曰後漢安帝祖母曰恭愍皇后
案後漢本紀安帝祖母曰敬隱皇后順帝母曰恭
愍皇后此傳當有缺文

徐廣傳

李太后薨廣議服曰成風顯夫人之號僖公

南傳作昭

公服三年之喪案春秋文四年冬夫人風氏薨杜

注僖公母風姓也孔疏釋例曰凡妾子爲君其母

爲夫人母以子貴也廣引此極合惟僖服三年喪

成風薨在僖後當是據禮而言耳南傳作昭服三

年喪誤

傅隆傳

爲孟昶建威將軍當從南傳作參軍

孔琳之傳

父殿光祿大夫南傳作父廕

王惠傳

太保宏從祖也案文失弟字南傳作誕從祖弟

謝宏徵傳

謝渾詩昔爲烏衣游戚戚皆親姪案南史姪作姓

爲是

王韶之傳

傳亮羊徽相代領西省事轉中書侍郎案南傳亮
徽相代在職義熙十一年武帝以韶之博學有文
辭補通直郎領西省事轉中書侍郎據此宋書必
有缺文

蕭思話傳

思話遷鎮南城案州郡志思話還治南鄭此云南
城誤

氏胡傳

楊統廢世子纂纂聚黨殺統案晉書符堅載記楊
統與纂分爭堅遣將攻之統纂出降以統爲南秦
州刺史據此統未嘗爲纂殺也

南齊書

柳世隆傳

父字雙憐位建威參軍事傳缺

輔國將軍中兵參軍王靈秀傳失中兵參軍四字

劉善明傳

開賓館以接荒民案南傳作接鄰國

庾杲之傳

祖深之雍州刺史南傳作義興太守

父粲司空參軍南傳作宋南郡王義宣丞相城局

參軍

劉瓛傳

父惠治書御史南傳作臨賀太守

居父喪不出廬南傳作居母憂

徐孝嗣傳

孝嗣卒後文缺案通鑑云孝嗣子演尙武康公主
況尙山陰公主皆坐誅可補也

陸慧曉傳

祖萬載侍中案南傳作自玩至慧曉祖萬載世爲
侍中

郢陽王寶夤傳

和帝立西臺以寶夤爲南徐州刺史少帝以爲荆
州刺史案和帝卽少帝也文不應重又是時蕭穎
胄方行荊州事何得復以寶夤爲荊州且和帝紀

有刺徐州文無刺荊州文疑有誤

宣德太后臨朝梁王爲建安王案和帝紀作建安郡公

中興二年謀反誅案竇奔魏未嘗誅也當如本紀書奔虜爲竇

梁書

武帝紀

天監六年九月丁亥誤書丙戌前

八年封廬陵王續紀失載

太平御覽刑法部二引梁書曰武帝敦睦九族優恤朝士有犯罪者皆諷臣下屈法申之百姓有罪卽案以法其緣坐老幼不免一人逃亡舉家質作人旣窮急奸宄益深後帝親南郊秣陵老人遮帝曰陛下爲法急于黎庶緩于權貴非長久之術誠能反是天下幸甚帝銳意儒雅疏簡刑法自公卿大臣咸不以鞠獄畱意奸吏招權巧文弄法貨賄成市多致枉濫大率三歲刑以及十歲至五千人
是時徒居作者具五任其無任者著斗械
斗械疑
若

疾病權解之今書無

昭明太子統傳

天監五年五月庚戌

南史同

出居東宮案本紀是年

五月厯書辛未乙亥辛巳丁亥庚寅辛卯等日下
六月又有庚子日則五月不得有庚戌

柳惔傳

卒年四十六南史作六十 又子照南史作昭

陸杲傳

祖徽宋建康令清平無私爲文帝所善厯廣州益

州刺史卹隱有方威惠兼著卒于官諡曰簡

見宋書良

吏傳缺

父獻揚州治中南史作揚州中從事

陸倕傳

子纘十歲通經南史作七歲 又次緬似倕一看

殆不能別

見南史

傳無

陸襄傳

襄本名衰字趙卿有奏事者誤字爲襄梁武帝乃

改爲襄字師卿

見南史

傳缺

南康王績傳

天監八年封案武紀七年九月立績爲南康郡王
周興嗣傳

太平御覽文部十七引梁書曰武帝取鍾王真迹
授周興嗣令選不複者千字韵而文之興嗣一宿
而上鬢鬚皆白被賞遇後興嗣目疾武帝親爲之
合藥今書無此但云次韻王羲之千字又左目盲
高祖手疏治疸方以賜之

劉峻傳

峻本名法武母許氏兄法鳳居貧不自立與母竝

出家爲尼僧旣而還俗

見南史

傳缺

劉訐傳

祖承宗宋太宰參軍傳失書

天監十七年卒南史作七年

劉歊傳

奉母兄以孝悌稱母有所須口未言歊已先知手

自營辦母病夢歊進藥翌日有聞其誠感如此見南

史傳缺

庾華傳

太守襄陽王饋之南史作永陽王 又賜米五十斛南史作穀五百斛

豫章王綜傳

綜奔魏改名纘

南史同

案魏書纘作贊

河東王譽傳

大通三年改封河東郡王案文大通上失中字

陳書

高祖紀

監宋隆郡所部安化二縣元不賓案安化謂崇化
南安二縣也考隋地理志可見

周文育傳

傳泰據堽口城南傳作堽口城

侯安都傳

擒齊儀同乞伏無勞南史作乞扶無芳

琳將潘純隨于城中遙射官軍南史作潘純

吳明徹傳

字通昭南史作通炤

馬主裴子烈南史作馬明成裴子烈

趙知禮傳

子允恭嗣南傳作元恭

蔡景懸傳

妻兄劉洽受歐陽武威絹南史作劉裕受歐陽威

絹

魏書

序紀

平帝七年匈奴宇文部大人莫槐爲其下所殺昭

帝五年宇文莫虜之子遜昵延朝貢案莫虜疑卽
莫槐

昭帝十二年賓人李雄僭帝號于蜀自稱大成案
晉書惠紀永興二年六月李雄僭帝位推考北魏
乃昭帝十一年也又晉書作國號蜀

穆帝四年劉琨牙門將郗延叛招引劉聰五年帝
討聰斬其將郗延案郗延疑卽郗延

晉京兆太守閻鼎立秦王業爲太子案晉書懷帝
紀作京兆太守梁綜

昭成帝諱什翼犍案晉書什俱作涉

四年劉務桓歸順帝以女妻之案帝卽位年十九不應有可嫁之女

十八年張元靖稱涼王案晉書靖作靚元靚本傳無稱涼王事穆帝紀永和十一年七月張元靚爲大將軍涼州牧

三十九年皇子寔君作亂紀缺

孝文帝紀

太和三年二月壬寅乾象六合殿成下四年正月

復云乾象六合殿成文複必有一誤

孝明帝紀

正光五年八月南秀容牧子于乞眞反案尔朱榮傳作南秀容牧子萬子乞眞

尔朱榮傳

武泰元年四月莊帝卽位七月葛榮向京師相州刺史李神軌閉門自守北史榮傳作李神儻案神軌死于河陰之難贈相州刺史見本書列傳河陰事在此先傳亦不言其爲相州刺史當由贈相州

致誤耳考李神儁傳肅宗末行相州事時葛榮南逼神儁憂懼故墜馬傷腳仍停汲郡有詔追還莊帝纂統拜散騎常侍據此神儁刺相州在孝莊卽位之先且身未至相州安得有閉門自守之事而本書李神傳云孝昌中行相州事建義初葛榮盡銳攻之久不能剋會尔朱榮擒葛榮事平以功進爵然則李神及神軌神儁姓名略同事又並在一時前後必有乖錯獨神傳有久不能剋等語與閉門自守之文頗合疑當是李神也

北齊書

神武帝紀

六世祖隱案上推當以神武爲一世父樹爲二世
樹父謚爲三世謚父湖爲四世湖父泰爲五世泰
父慶爲六世慶父隱爲七世不得言爲六世也

万俟普傳

授後將軍第二領人酋長案北史作累遷第二鎮
人酋長

可朱渾元傳

字通元案北史作道元

隸天光征關中以功爲渭州刺史案北史作隸天
光平万俟醜奴等以功封東縣伯孝武立累遷渭
州刺史

周書

蕭簪傳

普通六年封曲江縣公案梁武紀中大通三年六
月立曲阿公簪爲岳陽郡王當從曲阿爲正
所著文集十五卷案隋書經籍志作十卷

沈君游傳

有文集十卷案隋經籍志作沈君攸集十三卷

隋書

高祖紀

開皇元年三月書辛巳四月不得復有辛巳

四月書辛丑六月書癸未五月不得有戊子當從

北史作戊午

三年六月庚辰下書壬申誤

十一月巳酉下庚辰甲午當在十二月誤脫十二

月字

十年十一月丙午誤書辛丑上

十一年五月書甲子誤以上二月辛巳晦又下有
癸卯乙巳等日也

十二年七月壬申晦案律厯志是年七月十五日
己未則晦日當在癸酉

十二月癸酉乙酉下書己酉誤

十三年二月戊子書己卯上己卯下重書戊子竝
誤

十月乙卯以上七月戊辰晦推之十月無是日

十四年九月己未誤書丁巳上

十六年正月丁亥以十五年四月己丑朔推之誤
十八年五月辛亥誤竝同更以二十年正月辛酉
朔互推益見

十九年十二月乙未下書丁丑誤以下年正月辛
酉朔推之是年十二月無丁丑又案本書五行志
是年十二月乙未星賁于勃海文與此紀同據志
丁丑當爲衍文

仁壽四年六月庚申有星入月中以大業元年正月壬辰朔推之不當有庚申天文志作庚午北史同爲是

煬帝紀

大業六年十月壬申下書壬子誤以上正月癸亥朔推之是月無壬申北史同亦誤

八年三月重書甲午又戊戌誤書甲午上

九年二月書壬午誤以下三月有丙子也

十月丁亥誤書壬辰下

十二月二月甲子誤書癸亥上

北史同
亦誤

五月丙戌朔下書壬午誤

十三年九月己丑下十月書丁亥丙申戊戌案九月既有己丑則丁亥戌戌不得竝在十月蓋自己丑逆推之則丁亥在己丑前二日自己丑順推之則距丁亥五十九日若以己丑爲九月末則十月有戊戌而無丁亥以己丑爲九月初則十月有丁亥而無戊戌合書一月誤

恭帝紀

義甯元年十二月癸未薛舉自稱天子寇扶風案
唐書舉本傳寇扶風在高祖入關之前稱帝又在
寇扶風之前或不必其在十二月耶

二年正月壬戌將軍王世充爲李密所敗庚戌河
陽郡尉獨孤武都降于李密案二戌竝書一月則
庚戌當在壬戌之前

三月戊戌詔唐王備九錫之禮案下五月乙巳朔
則戊戌當在四月戊戌距乙巳僅八日也

律厯志

劉暉王頗等駁張胄元厯云從周天和元年至開
皇十五年張賓合者十張胄元合者五案下備言
賓胄元差合之數賓合九胄元合四至十四年止
當缺十五年一段也 又云胄元差者九八差後
一日一差前一日案下並差後一日無差前一日
者所書甲子必有誤 又云開皇五年十一月二
十二日乙亥冬至張賓厯甲戌冬至差前一日張
胄元厯合庚辰冬至案庚辰誤當爲乙亥旣云厯
合不得言庚辰也準上下文可見

天文志

開皇十四年十一月癸未有星孛于虛危案本紀作孛于角亢

經籍志

齊人胡毋子都傳公羊春秋授東海嬴公嬴公授東海孟卿孟卿授魯人眭孟案漢書儒林傳及眭孟傳孟爲廩公弟子非孟卿授也

梁安成王蕭欣集十卷案本傳作三十卷

梁護軍將軍甄元成集十卷案本傳作二十卷

梁吏部尙書蔡大寶有集三十卷度支尙書傅准
有集二十卷尙書右丞范迪有集十卷志均未載
楊元感傳

右驍衛大將軍來護兒赴援案護兒傳自右驍衛
轉右翊衛破元感驍當爲翊 又宇文述傳與左
禦衛將軍來護兒討元感左禦亦當爲右翊

李子雄傳

子雄勃海隋人案本書地理志隋時改隸信都
郡

張須陁傳

須陁弘農閿鄉人案本書地理志閿鄉屬河南郡